

22.september

**Uunga siunnersuut: Tusagassiutinut tapiissuteqartarneq pillugu Inatsisartut inatsisaat nr. xx. xx 2016-imeersoq**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siumumiit pingaartitaraarput erseqqissaassutigissallugu sutigut tamatigut akisussaassuseqartumik killilersugaangitsumik isummersorneq atuuttariaqartoq inuiaqatigiinut ineriartuutaasumik isummersorsinnaanissamut aqquasarmat.

Inuiaqatigiit akornanni tusagassiutit avammut nalunaarutigisartagaat ingerlatsinerilu annertuumik sunniuteqartuupput, taamaammat inuiaqatigiit akornanni isummersornertut tamatigoortuunissaat pingaaruteqarlutit, soorluttaaq killilersuinerit sapinngisamik pinngitsoortitassaallutik inuiaqatigiinni oqartusaqqatigiinneq illersorumallugu.

Aalajangiiffissatut siunnersuutigineqartumi “Tusagassiorfinnut tapiissuteqarneq” qulequttami nammineq oqariartuuteqarfiuvoq tapiissutit pineqartut, oqartussaassuseqarnermut killilersuineq pineqarani.

Siunnersuutigineqartumi siunertarineqarpoq inuit akunnerminni killilersugaangitsumik isummersoqatigiissinnaalernissaat piunasaqaatitalimmik tunngavilerlugu paasisimasamik tunniussaqaarsinnaanera annerusumik tunngavilersorluni ingerlatsineq anguniarneqassasoq.

Siunnersuut atuutilissappat marlunnik immikkoortortanik akuersissuteqartoqartalissaaq, pineqarlutik: “tapiissutinik agguaassinermut ataatsimiititaliap” iluarsartuullugit pilersaarussianut ingerlatassanut piunasaqaatit tunngavigalugit tapiissuteqarnissamik suliaqartunngussaaq, Naalakkersuisut ingerlatsinermut tapiissutinik tunniussaqaartassallutik, taamaaliornermi Inatsisartut aningaasaqarnermut inatsi aqquutigalugu aningaasat atorineqartussat qanoq annertussuseqartinneqartarnissaat anguniarneqarluni.

Siunnersuummi arlaannaannulluunniit attuumassuteqanngitsumik sulinissaq qulakkeeqqaniarneqarpoq suliffiusut qanoq katitigaanneranni ilanngullugu piunasaqarfiussammat, ass. sulisoqarnikkut aqqissugaaneq, ingerlatsinermut aningaasalersueriaatit 50%-ii sinnerlugiluunniit pisortanit tapiissutaappata ersarissumik aningaasalersugaanera il.il. takutitsiviuppata soqutigisanut immikkut attuumassuteqannginnissaq qulakkeerniarlugu ingerlatsisoqarnissaanik aalajangersaanikkut.

Maluginiagassaavoq tusarniaanermi akissutigineqartuni maanna tusagassiutit pioreersuniit aarleqqutigineqarsinnaasut ilagigaat aningaasaliissutit ataasiakkaanut mikisunut tunniussorlugit aggulukkaanni tamanna tusagassiuteqarnikkut sanngiillissitaasinnaasoq killormulli angisuut nukittuut aningaasalersorneqarpata tusagassiuteqarneq nukittoq atuutissasoq.

Siumumiit pingaartitaraarput tusagassiutit tamatigoortut periarfissarititaasunik ineriartorfiusuni

tamanut ammasumik atuutinneqarnissaat, taamaamat siunnersuutigineqartumi pilersaarusiornermut tapiissutitut ingerlatsinermullu tapiissutitut avinneqarnissaasa qulakkeertarumaaraat inatsisartutigit aningaasalersuinikkut tapiissutaajumaartussat qanoq isikkoqarumaarnissaat.

Maluginiagassaavoq inatsisartuni aningaasanik tapiissutaasussanut akuersinikkut suliniutit sorliit taperneqarnissaanut akuleruffiusussaangimmat.

Ullumikkut pissutsit naqitatigit nittartakkatigit allanneqartartut qulequttat tamarmik tassaasanngillat kalaallisut saqqummiunneqartartut kisiannili qallunaatuinnaq saqqummiunneqartartuullutik, tamanna nunatsinni tamat oqartussaananeramik illersuinerunngilaq kisiannili inuiaqatigiit amerlanerussuteqartunut mattussinertut oqaatigisariaqarluni.

Taamatuttaaq pingaartigaaq tusagassiornerni illuinnaasioq pinngitsoortinneqarnissaanik piumasaqarsinnaaneq annertunerusumik ingerlanneqartariaqartoq kissaatiginarmata.

Tamat oqartussaaqqataanerannut pingaaruteqarpoq killilersorneqanngitsunik innuttaasut malinnaatinneqarnissaat, tamanna pisinnaavoq inuiaqatigiit toqqaanartumik killilersugaanngitsumik malinnaatinneqarnerisigit ass. Inatsisartut ataatsimiinneranni malinnaanissamut periarfissaqartitsinikkut. Ajoraluartumik tamanna unitsinneqarnikuuvoq ammaqinneqarnissaanullu piumasuseqarfigineqarpassigani, taamaamat aatsaat immikkut iliuuseqarnikkut aaqqiivigineqarsinnaasoq takuneqarsinnaavoq.

Sakkortuumik kaammaattutigisariaqarpoq Naalakkersuisut sapinngisamik tamat oqartussaananeramik illersorumallugit nunaqqatitsinnut matut matoqqasut ilanngullugit ammaatiternissaanut annertusisamik suliniuteqarnissaanik ingerlatitseqqussallugit, soorluttaaq siunnersuummi naqitatigit tusagassiuarnerni piumasaqarnikkut tamanna ingerlanneqarsinnaasoq ujartorneqarmat iluarisimaaripput.

Naggasiutigalugu oqaatigisariaqarpoq Siumumiit nuannaarutigigatsigu nunarput pillugu kulturperput pillugu ilisimasaqareernissamik kissaateqarnermik inatsissatut siunnersuut imaqarmat, taamatullu saqqummersitat minnerpaamik kalaallisut allassimanissaanik piumasaqarfiummata. Tamanna nunatsinni allatigit tusagassiuarnerni nukittorsassallugu pisariaqartoq takussutissaqarpoq ineriartorfiusariaqarlunilu.

Taamatut oqaaseqarluta aalajangiiffissatut siunnersuut ilalerlugu matumuuna ataatsimiititaliamut susasaqartumut sukumiissumik misissorluarneqarnissaanut suliniuteqarfigisassanngorlugu ingerlatinneqassasoq Siumumiit inassutigissavarput.

Suka K.Frederiksen

Siumut